

दिनांक 29.05.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- देश रा 700 ऊं बत्ता जिलां मांय आज विकसित कृषि संकल्प अभियान सुरु व्हयो-प्रदेश मांय ई अभियान रा तैत करीब 4 हज़ार गांवां रा किसानां सागे चर्चा करी जावेला।
- मुख्यमंत्री भजनलाल शर्मा रो आज दिल्ली मांय केई केन्द्रीय मंत्रियां सागे मुलाकात रो कार्यक्रम-रेलवे रा सुबीता बधावण समेत केई खास मुद्दां माथे चर्चा व्हेला।
- महाराणा प्रताप जयंती रे मौके आज प्रदेश मांय वां ने सिरधा भाव सागे नमन करी ज्यो-मुख्यमंत्री भजन लाल शर्मा भूपालसागर मांय महाराणा प्रताप री मूरत रो अनावरण कीनो।
- प्रदेश मांय आज ई केई ठौड़ां हल्की बारिश -मौसम विभाग आवता 2-3 दिन मांय पारो 45-46 डिग्री सेल्सियस ताई पूगण रा आसार जताया।

देश रा करीब सात सौ जिलां मांय आज विकसित कृषि संकल्प अभियान सुरु व्हयो। केंद्रीय कृषि मंत्री शिवराज सिंह चौहान ओडिशा मांय पुरी ऊं इण री सुरुआत कीनी। ई अभियान रो मकसद किसानां ने नुवी तकनीक री जाणकारी देवणो, सरकारी योजनावां रो प्रचार करणो, मिट्टी रा स्वास्थ्य, संतुलित खाद अर कुदरती खेती रो महत्त्व समझावणो, किसानां ऊं नवाचार री जाणकारी लेवणो अर किसानां अर कृषि वैज्ञानिकां बीचे सीधी बातचीत करावणो है। केन्द्रीय कृषि राज्यमंत्री भागीरथ चौधरी प्रदेश मांय ई अभियान री सुरुआत अजमेर जिला रा रलावता गांव ऊं कीनी। वे जागरुकता रथ ने रवाना कीनो। ई मौके श्री चौधरी कह्यो के ओ केवल अभियान नी है बल्कि किसानां री बरकत अर खेती-बाड़ी मांय नवाचार जोड़बा वाळो राष्ट्रीय संकल्प है। वे किसानां ऊं ई अभियान ऊं जुड़ र नुवी तकनीकां सीख र खेती मांय काम लेवण री अपील कीनी।

कार्यक्रम मांय कृषि मंत्री किरोड़ी लाल मीणा कह्यो के विज्ञान अर किसान री ई भेली कोशिश ऊं किसानां ने उन्नत अर सक्षम बनाया जा सके है। बारह जून ताई चालण वाळा ई अभियान रे मार्फत देश रा बीस राज्यां मांय सात सौ जिलां रा पैसठ हजार ऊं बत्ता गांवां मांय वैज्ञानिकां री टीमां करीब डेढ करोड़ किसानां सागे सीधो संपर्क करेला।

प्रदेश री बावड़ियां ने बचावण सारु कार्य योजना बना र काम कर्यो जावेला। उपमुख्यमंत्री अर पर्यटन मंत्री दिया कुमारी आज राज्य री बावड़ियां ने बचावण रा बारा मांय जयपुर मांय राख्यी ज्यी एक मीटिंग मांय आ जाणकारी दीनी। वे कह्यो के ई सारु पर्यटन विभाग, पुरातत्व अर संग्रहालय विभाग रा अहलकारां ने मिल र काम करण बाबत् कही ज्यो है। पर्यटन मंत्री बावड़ियां ने सुधारण सागे वां मांय पाणी आवण रा गेला ई ठीक करावण रा हुकम दीना। वे बावड़ियां री सफाई करावण बाबत् ई कह्यो।

मुख्यमंत्री भजनलाल शर्मा राज्य सेवा रा अहलकारां रे खिलाफ अनुशासनात्मक कार्यवाही अर मुकदमो चलावण री मंजूरी ऊं जुड़्या 16 मामलां रो निपटारो कर दीनो है। श्री शर्मा भ्रष्टाचार निवारण संशोधन कानून, 2018 रा तैत 5 मामलां मांय मुकदमों चलावण अर धारा 17-ए रा एक मामला मांय विगतवार जांच अर अनुसंधान री मंजूरी दीनी है। काम री ठौड़ महिला उत्पीड़न रा मामला मांय दोषी ठहरायी ज्या अहलकार ने हटायी ज्यो है। ओहदा रा बेजा इस्तेमाल सागे सरकार ने माली नुकसाण पूगावण रा मामला मांय आरोपित अहलकार ने सरकारी नौकरी ऊं निकाळ दियो ज्यो है। रिटायर व्ह्या अहलकारां रा जूना मामलां रो निपटारो करता थकां 9 अहलकारां री पेंशन रोकण री कार्यवाही करी ज्यो है।

मुख्यमंत्री भजनलाल शर्मा आज नई दिल्ली पूग्या। वां रो केंद्रीय कोयला अर खान मंत्री जी. किशन रेड्डी सागे मुलाकात रो कार्यक्रम है। श्री शर्मा प्रदेश मांय खनन हलका रा विकास रा बारा मांय केंद्रीय खान मंत्री सागे बातचीत करेला। वे केंद्रीय आवासन अर शहरी कार्य अर ऊर्जा मंत्री मनोहर लाल खट्टर सागे ई प्रदेश मांय मेट्रो रेल ने बधावण, ई-बसां चलावण, एनसीआर प्लानिंग बोर्ड री परियोजनावां – बैटरी स्टोरेज सरीखा न्यारा-न्यारा मुद्दा माथे चर्चा करेला। ई पाछे वां रो रेल मंत्री अश्विनी वैष्णव सागे ई मुलाकात रो कार्यक्रम है।

अंतरराष्ट्रीय योग दिवस 2025 ऊं पैली सूचना अर प्रसारण मंत्रालय रा पत्र सूचना कार्यालय अर केंद्रीय संचार ब्यूरो री ओर ऊं आज जयपुर मांय ‘योग संवाद’ कार्यशाला राखी ज्यो। कार्यशाला मांय योगाचार्य ढाकाराम कह्यो के योग ऊं आनंद हासिल कर्यो जा सके है। कार्यशाला मांय राष्ट्रीय आयुर्वेद संस्थान रा योग अर स्वास्थ्य वृत्त विभाग रा सहायक आचार्य डॉ. पुनीत चतुर्वेदी कह्यो के योग सागे नींद अर खाण-पीण ई स्वस्थ जीवन सारू घणा ज़रूरी है।

कार्यशाला मांय आहार विशेषज्ञ तनुश्री सिंह मोटा अनाज ने खाण-पीण मांय शामिल करण माथे ज़ोर दीनो। ई मौके पत्र सूचना कार्यालय, जयपुर री अपर महानिदेशक ऋतु शुक्ला सगळां ऊं योग ने रोजमर्रा री जिन्दगी मांय शामिल करण री अपील कीनी।

वीर शिरोमणि महाराणा प्रताप री जयंती रे मौके आज पूरा राज्य मांय वां ने सिरधाभाव सागे याद करी ज्या। ई मौके राज्यपाल हरिभाऊ बागडे जयपुर रा राजभवन मांय महाराणा प्रताप री मूरत ने माळा पहरा र वां ने सिरधाभाव सागे याद कीना।

श्री बागडे कह्यो के महाराणा प्रताप देश रा प्रति संकल्पबद्ध व्हे र लड़ता थकां सब कुछ निछावर करण री सीख देवण वाळा पहला राष्ट्र नायक हा। राज्यपाल नुवी पीढी ने महाराणा प्रताप री गौरवगाथा ऊं जोड़बा बाबत् ई कह्यो। मुख्यमंत्री भजनलाल शर्मा चित्तौड़गढ़ रा भूपालसागर मांय राखी ज्या कार्यक्रम मांय महाराणा प्रताप, पन्नाधाय अर राणा पूंजा री मूरत रो अनावरण कीनो। ई मौके श्री शर्मा विकास रा 517 करोड़ रुपया रा कामां री नींव रखी अर पूरा व्ह्या काम जनता ने संप्या। वे कह्यो के जिण भांत मुश्किल हालात मांय महाराणा प्रताप वां रा सिद्धान्तां अर खुद रा मान सागे कोई समझौतो नी कीनो, वां ई भांत नुवी पीढी ने ई सिद्धान्तां रे मुजब चालणो चाहिजे।

मुख्यमंत्री कह्यो के महाराणा प्रताप रा नाम ऊं वां रे काम करण री न्यारी-न्यारी ठौड़ां चावंड, गोगुंदा, दिवेर अर हल्दीघाटी समेत केई ठौड़ां ने जोड़ र प्रताप पर्यटन सर्किट बणायो जा रह्यो है। मुख्यमंत्री प्रताप खेल विश्वविद्यालय खोलण री जाणकारी ई दीनी। **श्री शर्मा कह्यो के 5 जून ने विश्व पर्यावरण दिवस अर गंगा दशहरा रा अनोखा संयोग रे दिन प्रदेश भर मांय पखवाड़ो चलायो जावेला।** मुख्यमंत्री जनता ऊं गंगा दशहरा रे मौके कूड़ा-बावड़ियां अर तळावां री साफ-सफाई अर पूजन करण री अरज कीनी। श्री शर्मा कह्यो के प्रदेश मांय एक पेड़ मां के नाम अभियान रा तैत ई साल 11 करोड़ पौधा रोप्या जावेला। कार्यक्रम मांय गृह राज्यमंत्री जवाहर सिंह बेढ़म, सहकारिता मंत्री गौतम दक अर सांसद सी.पी. जोशी समेत केई विधायक ई मौजूद रह्या। डूंगरपुर मांय न्यारा-न्यारा संगठनां री ओर ऊं महाराणा प्रताप री मूरत माथे फूल माळा चढ़ाई ज्यी अर महाराणा प्रताप रा त्याग, तपस्या अर बलिदान ने याद करता थकां वां ऊं सीख लेवण रो संकल्प करी ज्यो। पाली मांय सूरजपोल ऊं महाराणा प्रताप स्मारक ताई शोभायात्रा निकाळी ज्यी।

सामाजिक न्याय अर अधिकारिता मंत्री अविनाश गहलोत दूजा सागे महाराणा प्रताप री मूरत माथे सिरधा रा फूल चढ़ाया। ई मौके राख्यी ज्यी संगोष्ठी मांय श्री गहलोत ऑपरेशन सिंदूर री कामयाबी रा बारा मांय कविता बांची। वे कह्यो के पाली मांय बेगो ई महाराणा प्रताप ऑडिटोरियम बणायो जावेला। सवाईमाधोपुर मांय ई न्यारा-न्यारा संगठनां री ओर ऊं महाराणा प्रताप री मूरत माथे फूल माळा चढ़ा र वां रा समर्पण अर बलिदान ने याद करी ज्यो। कोटपुतली-बहरोड़ अर झालावाड़ मांय महाराणा प्रताप रा फोटो माथे फूल चढ़ायी ज्यो अर संगोष्ठी समेत न्यारा-न्यारा कार्यक्रम राख्यी ज्यो। भरतपुर मांय आज रो दिन पराक्रम दिवस रा तौर ऊं मनायी ज्यो अर महाराणा प्रताप री मूरत ने गंगाजल ऊं नहलाई ज्यी। बारां मांय सिंज्यां री पोर मोटरसाइकिल रैली निकाळी जावेला अर कवि सम्मेलन व्हेला। राजसमंद मांय खमनोर रा अरण्य बाग मांय महाराणा प्रताप जयंती समारोह रख र तीन दिन रो कार्यक्रम सरू करी ज्यो। ई मौके खमनोर ऊं शोभायात्रा निकाळी ज्यी। उदयपुर मांय ई चेतक सर्किल ऊं टाउन हॉल ताई शोभा यात्रा निकाळी ज्यी। ई मौके राख्यी ज्यो कार्यक्रम मांय केन्द्रीय मंत्री गजेन्द्र सिंह शेखावत अर विधानसभा अध्यक्ष वासुदेव देवनानी ई सिरकत कीनी। श्री शेखावत इतिहास ने सही संदर्भ मांय लिखण री जरूरत बतायी।

.....

प्रदेश मांय आज केई ठौड़ां छांटो-छिड़को व्हेवण अर कठे-कठे हल्की बारिश रा समाचार है। राजधानी जयपुर मांय आज संवारे ऊं ई बादळा मण्ड्या रह्या अर कुछ हलकां मांय छांटो-छिड़को व्ह्यो। सवाईमाधोपुर मांय दोपहरां पाछे हल्की बरसात व्ही। दौसा जिला मांय केई ठौड़ां रिमझिम बारिश रो दौर चाल्यो। दूजी कानी राज्य रा आतूणी हलकां मांय पारो 44 डिग्री सेल्सियस रे आरे-सारे रह्यो। मौसम केन्द्र जयपुर रे मुजब प्रदेश रा केई हलकां मांय आवता दो-तीन दिन ताई तापमान 45-46 डिग्री सेल्सियस ताई पूगबा री संभावना है। मौसम महकमा रे मुजब नमी बत्ती व्हेवण ऊं उमस भरी गर्मी रेहवण रा आसार है। महकमो आज अर काल कोटा, उदयपुर, भरतपुर, अजमेर, बीकानेर अर जयपुर संभाग मांय कठे-कठे बिरखा व्हेवण रा आसार जताया है।

.....